

TUTÚ NÍ CADÚHA TÉ PÄBLÚ QUIHÍⁿ NDAHA ÑÁYIU ÑUÚ CÒLOSÁ

Té Păblú cādŭha-dé tutú quíhíⁿ ndaha ñáyiú xĩndecu ichi Xítóhó Jesucrístú ndécú ñuú Còlosá

1 ¹Yúhú té Păblú ní tendaha ñaha Yá Ndiöxí cāháⁿ-í tnúhu Xítóhó Jesucrístú núú ñáyiú chi ducaⁿ cuení méé Yă Ndiöxí cunduu, te cādúha-í tutú-a ndihi té Timùteú ²cuendá daquixi-í ndaha nchòhó ñáyiú ñuú Còlosá, ñáyiú cùu cuendá Yă Ndiöxí, ñáyiú quide ndáá ndécú ichi Xítóhó Jesucrístú, te xicáⁿ táhù-í núú Tătá-ó Dütú Ndiöxí sá ïo na chĩndee chitúu ñaha-gă xii-ndo, te ducaⁿ ndì nduú-gá ná cādá te ío váha cuu iní-ndó cũndecu-ndo.

Té Păblú cāháⁿ ndihi-dé Yă Ndiöxí cuendá ñáyiú sàndáá iní ñáhá xii Xítóhó Jesucrístú

³Te ducaⁿ-ni cāháⁿ ndihi-ndí Yă Ndiöxí Yaá cúu Tătá Xítóhó Jesucrístú ndacáⁿ táhú-ndí núú-gă cuendá nchaa nacuáa quide-ndo ndecu-ndo, ⁴chi ñihí-ndí tnúhu sá ïo sàndáá iní-ndó Xítóhó Jesucrístú, te ducaⁿ ïo cùu iní-ndó nchaa ñáyiú cùu cuendá Yă Ndiöxí. ⁵Te ducaⁿ quide-ndo chi sàndáá iní-ndó sã ndúú tãhú-ndó cũndecu-ndo núú ndécú Xítóhó Jesucrístú, te tnúhu-áⁿ ñí ñihí-ndó cũtnàhá ní xĩndedóho-ndo tnũhu ndáá tnúhu Xítóhó Jesucrístú. ⁶Te tnúhu Xítóhó Jesucrístú tá xité nuu-xi ñihí ñuyú cuáháⁿ. Te vai ñáyiú ta sàndáá iní-yu cuáháⁿ, te ta quidé-yu mee-ni sã vãha cuáháⁿ ndécũ-yu ichi-gá. Te nchòhó chi ndéé cútnàhá ní tecú dóho-ndo tnũhu-gá ní quesaha-xi ta cùu vai ñáyiú ñuú-ndó tá quide ndáá-yu núú-gă cuáháⁿ. Te dàvá-áⁿ ñí cutnùní ndáá ndisa iní-ndó sã Yă Ndiöxí ío chĩndee chitúu ñaha-gă xii-ndo. ⁷Te ducaⁿ ñí dánèhé ñáhá tẽ Ępafrás tée ío cùu iní-ndí, chi tnàhá-dé ío quide ndáá-dé xínú cuèchi-dé núú Xítóhó Jesucrístú quidé-dẽ núú-ndí dácuaàha ñaha-dé xii-ndo tnũhu-gá. ⁸Te cāchí tnúhu-dé xii-ndí sá ïo cùu iní ñáhá-ndó xii-ndí, te ducaⁿ quide-ndo chi Espíritú Yă Ndiöxí chĩndèe ñaha-xi xii-ndo.

⁹Te ndéé cútnàhá ní ñihí-ndí tnúhu nacuáa quide-ndo ndecu-ndo ndéé dàvá-áⁿ ñí ngüíta-ndí ñá túú dàña ndee-ndí xicáⁿ táhú-ndí núú Yă Ndiöxí

cuendá-ndó sã Espíritú-gá ná tàxi-xi nchaa-gá sá cúmăní quiní tnùní-ndó, te ducaⁿ te cutnùní vãha-gá iní-ndó nàcuáa cuiní Yã Ndiöxí cada-ndo. ¹⁰Te sá dúcáⁿ te ndacu-ndo càda-ndo mee-ni sá vãha dàtná cuiní Xítóhó Jesucrístú cada nchaa ñáyiu ndècu ichi-gá. Te ducaⁿ ïo nduu vétú iní-gá te núu na càda-ndo nchaa núu sã vãha. Te ducaⁿ ïo-gá cuita cutnùní iní-ndó nchaa nacuáa cuiní Yã Ndiöxí cada-ndo. ¹¹Te mee-gã cúú-gã Yaá ío cùnuu, te diu-gá ío chindee ñãha-gá xii-ndo, te cudíí ìní-ndó cuèi nãndi na càda ñaha ñáyiu xii-ndo sã cuendá-gá, te ducaⁿ ïo cunduu càhnu iní-ndó. ¹²Te ndacáⁿ táhú-ó núú Dütú Ndiöxí chi ní quide túha ñaha-gã xii-o cuendá nduu táhú-ó cùndecu-o ndihi nchaa dava-gá ñáyiu yìndaha-gá xìndecu núú cándò canine ñá túú tnàhí-gá ni ìⁿ cuèchi ío. ¹³Te diu-gá ní quide ní dáñá-ó nchaa ichi cuehé ichi duha núú táxi tnùní yucu ñãvãha, te ní nachihi ñaha-gã xii-o ndàha Déhe-gá Yaá ío cùu iní-gá. ¹⁴Te Déhe-gá ní xíhí-gá cuendá sá nchóó càcu nihnu-o núú ùhú núú ndàhú, te ní quide càhnu iní-gá nchaa sá cuèhé sá dúhá ñí quide-o.

Ñáyiu cùu ìⁿnuu ndihi Yá Ndiöxí cuendá sá ñí xíhí Xítóhó Jesucrístú

¹⁵Te Yá Ndiöxí cúú-gã Yaá vá cúú quìní-ó dico Xítóhó Jesucrístú chi ní quixi túu-gá ñuyíú-a, te ní quide-gá nchaa nàcuáa sàni iní-gá. Te dàtná-ni sàni iní-gá te ducaⁿ sàni iní Yã Ndiöxí, te Yaá-áⁿ ducaⁿ-ni ndècu-gá ndéé cútnàhá vátá ngãva-gá ñuyíú. ¹⁶Te Xítóhó Jesucrístú ní quide-gá núú Yã Ndiöxí ní cadúha-gá nchaa sá ío andiu ndihi nchaa sá ío ñuyíú-a, te ní cadúha-gá nchaa sá cúú quìní núú-ó cùndehe-o, ndihi nchaa sá vã quìní tnàhí-o, ndihi nchaa espíritú cùnùu vihi xinu cuechi núú Yã Ndiöxí, ndihi nchaa dava-gá espíritú xínú cuèchi. Te nchaa ní cadúha Xítóhó Jesucrístú chi ducaⁿ ñí cachí Yã Ndiöxí cunduu. Te ducaⁿ ñí cachí Yã Ndiöxí cunduu cuendá nchaa cuu-xi mee-ni sã vãha sá cúú-xí Xítóhó Jesucrístú. ¹⁷Te Xítóhó Jesucrístú ducaⁿ-ni ndècu-gá ndéé cútnàhá vátá ngãva-gá ñuyíú-a, te diu núú ndáhá-gã cándòdo ñuyíú-a, ndihi andiu, ndihi nchaandi túhú sá ío. ¹⁸Te diu Xítóhó Jesucrístú cùnùu-gá yìndàha ñaha-gá xii nchaa nchoo ñáyiu ndècu ichi-gá, te diu-gá quídé-gã ndécú vãha-o núú-gã. Te núú ncháá ñáyiu ndoto diu-gá cúú-gã Yaá ío càhnu cuu sa ní ndoto, te sá dúcáⁿ ñí ndoto-gá te xíãⁿ cúú-gã Yaá ío tàxi tnùní nchaandi túhú sá ío ñuyíú-a ndihi andiu. ¹⁹Te ducaⁿ ïo cùnùu-gá táxi tnùní-gá chi ndáá sá ìⁿ-ni cuu-gá ndihi Yá Ndiöxí. ²⁰Te Xítóhó Jesucrístú ní xíhí-gá núú cùrúxí, chi ducaⁿ ñí cuiní Yã Ndiöxí cunduu cuendá sá vã yõ ìⁿ-gá cuu úhú iní ñáhá xii-gá cuèi ñáyiu xìndecu ñuyíú-a, te cuèi cue espíritú ndécú àndiu.

²¹Te nchòhó cútnàhá vátá cùndècu-gá-ndó ìchi Xítóhó Jesucrístú ñá túú tnàhí ni xõ cáháⁿ ndihi-ndo-gã, chi mee-ni ñí xóo cuu úhú iní-ndó-gã, te mee-ni nchaa sá cuèhé sá dúhá ñí xóo cunuu ñí xóo cada-ndo ni cùu, dico

Xítohó Jesucrístú ní quide-gá ní tnahá tnúhu-ndo ndìhi Yá Ndiöxí vitna. **22**Chi diu cuendá-áⁿ ñí xíhí Xítohó Jesucrístú núú cùrúxí cuendá sá nchóó ndùu ndoo nduu nine iní-ó ngündecu-o nùú Yă Ndiöxí, te ducaⁿ te ñá túú tnàhí-gá ná cumání-ó nùú-gă, te vá yöö ìⁿ-gá cachí sá nchóó ndècu cuéchi-o. **23**Te núú vá dáñá ndèe-ndó quindáá iní-ndó Xítohó Jesucrístú, te cundecu-ni-ndo ìchi-gá, te vá cání iní-ndó dàña-ndo tnúhu ndee iní ní taxi-gá ndécú ndìhi-o. Te nchaá tnúhu-gá-áⁿ tá xíté nuu-xi ñihí ñuyúú cuáháⁿ, te diu-ni tnúhu-áⁿ cáháⁿ yúhú té Păblú dánèhé-í ñáyiú.

**Té Păblú yíhí dǐquí-dě cáháⁿ-dé tnúhu Xítohó Jesucrístú
núú ñáyiú ndècu ichi-gá**

24Te vitna ío cùdíí iní-í ndóhò-í cuendá-ndó, chi Xítohó Jesucrístú ío ní ndoho-gá cuendá-ó, te tnàhá yúhú ndóhò-í cuendá nchaá ñáyiú ndècu ichi-gá, dico vitna cùmání-gă ndoho-í cuendá-yu. **25**Te Yá Ndiöxí ní cachí-gá sá yúhú quihi díquí ñáhà-í xii nchaá nchòhó ñáyiú ndècu ichi-gá cuendá danèhé ñáhá văha-í xii-ndo tnúhu-gá cuendá cuu-xi sá văha sá cúú-xí-ndó. **26**Te nchaá tnúhu sá dánèhé ñáhà-í xii-ndo ñà túú ní tècú dóho nchaá ñáyiú ní xíndecu ndéé sanaha, te mee-gă ní cuiní-gá sá ncháá nchò ñáyiú yìndaha-gá vitna cundecu ndìhi-o tnúhu-áⁿ. **27**Te mee-gă ní cachí-gá sá dátúu-gá nchaá tnúhu sá ïo vii ío váha cuáháⁿ núú nchàa ñáyiú yìndaha-gá. Te tnúhu-áⁿ cúú-xí cuendá tnàhá nchaá nchòhó ñáyiú ñá túú cùú ñáyiú isràél. Te tnúhu-áⁿ dánèhé ñáhá-xí xii-ndo sá Xítohó Jesucrístú ndécú ndìhi ñaha-gá xii-ndo. Te cuendá xíáⁿ ní ngündecu ndìhi-ndo tnúhu ndee iní cundecu-ndo ndìhi-gá ni caa ni quíhíⁿ.

28Te nchúhú mee-ni cuendá Xítohó Jesucrístú cáháⁿ váha-ndí, te dàsahú-ndí ñáyiú nàcuáa cadá-yu. Te váha vîhi danehé-ndí nchaá ñáyiú nàcuáa tecú tnùní-yu tnúhu-gá, te ducaⁿ dānehé-ndí-yu nàcuáa cundáá-yu núú Yă Ndiöxí, te ducaⁿ chi tnàhá tnúhu-yu ndìhi Xítohó Jesucrístú. **29**Te cuendá xíáⁿ ío ndùcu ndee-í quídè-í chiuⁿ Xítohó Jesucrístú, te mee-gă ío chindee ñaha-gá xii-í nùu xíáⁿ ndácù-í quídè-í chiuⁿ-gá.

2¹Te cuiní-í sá nchòhó cutnùní iní-ndó să ïo sàni iní-í cuendá-ndó, ndìhi cuendá nchaá ñáyiú ndècu ñúú Laodiceá, ñáyiú xíndecu ichi Xítohó Jesucrístú. Te ducaⁿ-ni ïo sàni iní-í cuendá nchaá ñáyiú vátá quíní ñáhá-gă xii-í. **2**Te cuiní-í sá nchòhó ndìhi nchaá ñáyiú-áⁿ ïo nducu ndèe-ndo canchicúⁿ nihnu-ndo ìchi Xítohó Jesucrístú, te ío cuu iní tnáhá-ndó, te ducaⁿ cùu ìⁿnuu-ndo cundecu-ndo. Te cuiní-í sá nchòhó ndìhi dava-gá ñáyiú-áⁿ ïo váha sáá sá xìní tnùní-ndó cuendá tecú tnùní-ndó nchàa nacuáa ndùu cuendá Xítohó Jesucrístú chi ío ndùu yuhu ni cuu, dico vitna ní dátúu-gá núú-ó. **3**Te Xítohó Jesucrístú néhé văha-gá nchaá tnúhu sá ïo xìní ñuhu-xi tecú tnùní-ó. **4**Te duha cáháⁿ-í chi cuiní-í sá vă quindáá iní-ndó ñi

iiⁿ tnúhu càháⁿ nchaa ñáyiú cuìní dandàhú ñáhá xii-ndo cuéi ío váha càháⁿ-yu. ⁵Te cuéi ñá túú ndècu ndìhi ñaha-í xii-ndo dico ducaⁿ-ni ïo ñùhu iní ñáhà-í, te ío cùdíí iní-í chi ñihí-í tnúhu sá ïo cùu iiⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítohó Jesucrìstú.

⁶Te dàtná-ni ní sàndáá iní-ndó Xítohó Jesucrìstú, te ducaⁿ-ni quìndáá iní-ndó-gă canchicúⁿ nihnu-ndo ìchi-gá. ⁷Te ni yùhu ni iní-ndó cànchicúⁿ nihnu-ndo ìchi-gá, te ducaⁿ cuìta cutnuni-gá iní-ndó nchàa nacuáa càháⁿ-gá quíhíⁿ. Te vá dáña ndèe tnàhí-ndo quìndáá iní-ndó nchàa tnúhu sá ñí dánèhé ñáhá cuè téè càháⁿ tnúhu-gá xii-ndo. Te xini ñuhu-xi ndacáⁿ táhú vîhi-ndo núú Yá Ndiöxí cuèndá nchaa tnúhu-áⁿ.

Ñáyiú ío váha tnàhá tnúhu ndìhi Xítohó Jesucrìstú

⁸Te ío quíhi iní-ndó cùndecu-ndo chi xica cuu ñáyiú cuìní dandàhú ñáhá xii-ndo, te ñáyiú-áⁿ càháⁿ-yu mee-ni nchàa tnúhu ní cahu iní nchaa cue téè ñuyú-a, te nchaa tnúhu-áⁿ ñá túú vèdana nàndíhi-xi. Te ducaⁿ quìdé-yu chi nchìcúⁿ nihnu-ní-yu nchaa nàcuáa ní xóo cada ñáyiú ní xíndecu ndeé sanaha. Te càháⁿ-yu nàcuáa sàni iní yucu ñávàha, te ñá túú càháⁿ-yu nàcuáa cuìní méé Xítohó Jesucrìstú.

⁹Te Xítohó Jesucrìstú cúu-gă iiⁿ ñáyiú dico iiⁿ-ni cùu-gá ndìhi Dútú Ndiöxí. ¹⁰Te nchòhó chi ñá túú tnàhí-gá ná cúmăní-ndó nùú-gă chi ndècu ndìhi-ndo Xítohó Jesucrìstú. Te ío cùnūu-gá te tàxi tnuni-gá nchaa núú cuè espíritú cùnūu. ¹¹Te mee-gă ní ndada ndoo ní ndada nine-gá iní-ndó chi ní ngúndecu ndìhi-ndo-gă te ducaⁿ ñá túú-gă ndécú-ndó ìchi cuehé ichi duha, te cada iní-ndó să ñí ngúndecu ndìhi-ndo ìⁿ seña, chi ní ndada ndoo ní ndada nine-gá iní-ndó, dico ñá díú iiⁿ-ni cuu-xi ndìhi seña sá sàha cue téè isràél ñii-güedé. ¹²Te nchòhó sa ní sandute-ndo te cada iní-ndó să dàtná tnúhu sá ñí xíhí-ndó ndìhi Xítohó Jesucrìstú, te ní nguíndüxi-ndo ndìhi-gá, te ní ndoto-ndo ndìhi-gá, te ducaⁿ càda iní-ndó chi ñá túú-gă ndécú-ndó ìchi cuehé ichi duha. Te ducaⁿ chi sàndáá iní-ndó nchàa nacuáa quìde Yá Ndiöxí, te diu-gá ní dándótó-gă Xítohó Jesucrìstú. ¹³Te nchòhó cútnàhá ndécú-ndó ìchi cuehé ichi duha cùu-ndo datná ñáyiú ní xíhí, chi ñá túú tnàhá tnúhu-ndo ndìhi Yá Ndiöxí ní cùu, te ni ñá díú ñáyiú isràél cúu-ndó. Te Yá Ndiöxí ní cachí-gá sá nchóó ïo váha tnahá tnúhu-o ndìhi Xítohó Jesucrìstú vitna. Te ducaⁿ ñí quide-gá chi sa ní quide càhnu iní-gá nchaa sá cuèhé sá dúhá ñí xóo cada-o. ¹⁴Te vitna duuⁿ duuⁿ ñá túú-gă cuéchi-o ndècu núú-gă. Te nchoo ñà túú cuìní-ó càda-o nacuáa càháⁿ-gá, te cuèndá xíáⁿ ío ndècuéchi-o, te vâi nacháhu-o nùú-gă ní cùu. Te vitna ñá túú-gă ni iiⁿ cuéchi-o ndècu núú-gă, chi diu cuèndá-áⁿ ñí xíhí Xítohó Jesucrìstú núú cùrúxí. ¹⁵Te sá dúcáⁿ ñí xíhí Xítohó Jesucrìstú núú cùrúxí, te duuⁿ duuⁿ ní

dáquéé t̄hú-gă sácuíhná ndihí nchaa espíritú cúnđihí-xi, te ní quendóo canúú-xi, te mee-gă ío cùnūu-gă táxí tnùní-gă.

Nanducu nihnu-o mee-ni sá v̄aha c̄achí Xítóhó Jesucristú

16Te núu dava ñáyiū x̄icuèhé ñáhă-yū xii-ndo cuendá sá ñà túú x̄exi-ndo x̄ihí-ndo datná quidé mèe-yū te v̄a c̄adá cuendá-ndó, te ni v̄a c̄adá cuendá-ndó te núu x̄icuèhé ñáhă-yū xii-ndo cuendá sá ñà túú c̄anehe íí-ndó v̄ico quide meé-yū núú cuiá núú cuiá, ndihí vico quidé-yū ndi tnahá yóó, ndihí cuendá sá ñà túú c̄anehe íí-ndó ndūu ndetatú-yū. **17**Te n̄acuáa quidé-yū ndi tnahá òré quidě-yū nchaa vico-áⁿ, ndihí n̄acuáa quidé-yū ndi tnahá nchaa ndūu c̄anehe íí-yū-áⁿ, te cada iní-ó s̄a s̄a quidě-yū-áⁿ dánèhé núú ñáhá-xí n̄acuáa cada Xítóhó Jesucristú núú cuáháⁿ núú v̄exi. **18**Te v̄a quindáá iní-ndó ñi ñiⁿ tnúhu c̄aháⁿ ñáyiū c̄achí sá cuíta nihnu-ndo cuendá sá ñà túú tn̄i-ndo tnúhu c̄aháⁿ-yū, chi c̄achí-yū sá ío x̄ini ñuhu-xi cada cahnu-o nchaa cue espíritú x̄ínú cuèchi núú Ȳá Ndiõxí, te ni ȳuhu ni iní-ó c̄anehe-o sá ȳñ̄uhu núú-xi. Te ñáyiū-áⁿ c̄achí-yū sá ndàá c̄aháⁿ-yū chi d̄acoto ñaha saní-yū n̄acuáa c̄aháⁿ-yū, te ío quide cahnú-yū mèe-yū cuendá nchaa sá s̄aní iní m̄eé-yū quidé-yū, te ñà túú v̄edana n̄andíhi nchaa sá quidě-yū. **19**Te nchaa ñáyiū ducaⁿ x̄iquide-áⁿ ñà túú tn̄ahá tnúhu-yū ndihí Xítóhó Jesucristú. Te mee-gă cúú-gă Yaá cúnūu taxi tnuní ñáhá-gă xii nchaa nchoo ñáyiū nd̄ecu ichi-gă, te ch̄indee ñaha-gă xii-o nd̄ecu-o ichi-gă, te mee-gă quidé-gă cúú ñiⁿnuu-o nd̄ecu-o, te ta quide-o nchaa n̄acuáa cuiní Ȳá Ndiõxí cuáháⁿ.

20Te nchòhó cúú-ndó d̄atná ñáyiū ní x̄ihí ndihí Xítóhó Jesucristú cuendá sá v̄a c̄anch̄icúⁿ nihnu-gă-ndó n̄acuáa c̄aháⁿ ñáyiū ñà túú nd̄ecu ichi-gă. Te núu ducaⁿ ña, ¿te ná cuendá tn̄í-ní-ndó tn̄uhu c̄aháⁿ ñáyiū-áⁿ te quide-ni-ndo datná quidě-yū? **21**Chi ñáyiū-áⁿ c̄achí-yū sá ío sá ni v̄a cúú t̄eè ndaha-o, te dava ni v̄a cúú c̄axi-o, te dava ni v̄a cúú tn̄i-o. **22**Te nchaa x̄iáⁿ, núú néhé ch̄iūⁿ-ni-o ndihí nihnu-xi. Te nchaa sá dúcáⁿ c̄aháⁿ-yū-áⁿ cúú-xí mèe-ni sá ñi cahu iní m̄eé nchàa ñáyiū ñuyíú-a n̄acuáa cadá-yū cundecú-yū. **23**Te nchaa tnúhu c̄aháⁿ-yū-áⁿ s̄ánūu sá cúú-xí ñiⁿ tnúhu c̄aháⁿ ñiⁿ t̄eé ío v̄aha s̄àá díquí-xi, chi c̄achí-yū sá c̄adá cahnu-o Ȳá Ndiõxí n̄acuáa v̄exi iní m̄eé-ó, te cundūu nd̄ahú iní-ó dico ñà túú d̄anehé ñáhă-yū n̄acuáa tàú-xi cundūu. Te c̄achí tucú-yū sá c̄adá ūhú-ó mèe-o, chi ducaⁿ cuiní Ȳá Ndiõxí cada-o c̄achí-yū. Te nchaa x̄iáⁿ ñà túú v̄edana ch̄indee ñaha-xi xii-o cuendá sá v̄a táxí tnùní ñáhá ñiⁿ sá cuèhé sá dúhá s̄ani iní-ó.

3¹Te nchòhó cada iní-ndó s̄a ñi x̄ihí-ndó ndihí Xítóhó Jesucristú te ní ndoto-ndo ndihí-gă, núu x̄iáⁿ tàú-ndó càda-ndo nchaa sá v̄aha d̄atná cuiní m̄eé-gă chi mee-gă núc̄oo-gă xio c̄uha Dútú Ndiõxí chi tn̄ahá-gă ío cùnūu-gă. ²Te ío cūhūⁿ iní-ndó nchàa sá v̄aha c̄achí Xítóhó Jesucristú ndūu

táhú-ndó cùndecu ndìhi-ndo, te vá cùhúⁿ ìní-ndó mèe-ni nchaa sá ìó ñuyíu-a. ³Te ducaⁿ càda-ndo chi cùu-ndo datná ñáyiu ní xíhí ndìhi Xítóhó Jesucristú, chi ñá túú-gă ndécú-ndó ìchi cuehé ichi duha. Te Yá Ndiöxí néhé cuendá ñáhá-gă xii-ndo chi tnàhá tnúhu-ndo ndìhi Xítóhó Jesucristú. ⁴Te Xítóhó Jesucristú cúú-gă Yaá ndécú ndìhi ñaha xii-o vitna, te sáá nduu quèe túu ndìhi ñaha-gă xii-o àndiu, te tnàhá-ó ìo cunuu-o ndìhi-gă.

Duuⁿ duuⁿ dañ-a-o nchàa sá cuèhé sá dúhá ñùhu iní-ó te cada-o mèe-ni sá vǎha

⁵Te duuⁿ duuⁿ dañ-ndo nchàa sá cuèhé sá dúhá ñùhu iní-ndó. Te nchaa nchòhó cue tée vá càháⁿ ndìhi-ndo ñáyiu òhí te núu ñá díú ñàdìhí-ndó cùú-yu, te ducaⁿ-ni nchàa nchòhó cue ñáyiu òhí tucu vá càháⁿ ndìhi-ndo cuè tée te núu ñá díú yì-ndo cuu-güedé, te nchaa-ndo vǎ cání-gă iní-ndó càda-ndo ni ìⁿ sá cuèhé sá dúhá ndìhi tnaha ñáyiu-ndo. Te vá cání cuèhé cani duha-gă iní-ndó sǎ cúú-xí-ndó ndìhí-yu, te vá cání-gă iní-ndó nì ìⁿ sá cuèhé sá dúhá, te ni vǎ xíhó-ndó ìⁿ sá ndécú ndìhi tnaha ñáyiu-ndo, chi núu ducaⁿ na càda-ndo xiho-ndo sá ndécú ndìhí-yu te ìⁿ-ni cùu-ndo ndìhi ñáyiu chìnùhu nchaa sá càchí-yu cùu ndióxí te ñá ndàá sá ndiöxí cúú nchàa xǎⁿ. ⁶Te nchaa ñáyiu ducaⁿ xǐquide ío dandòho ñaha Yá Ndiöxí xii-yu na sáá nduu tnúndòho tnúhu ndàhú, chi ñá túú sàndáá iní ñáhǎ-yu xii-gă. ⁷Te nchòhó cútnàhá ní xíndecu-ndo ìchi cuehé ichi duha, te tnàhá-ndó nǐ xóo cada-ndo dàtná quidé nchàa ñáyiu-áⁿ. ⁸Te vitna duuⁿ duuⁿ dañ-ndo nchàa sá ná càchí tnúhu-í-a: Vá cúdǎéⁿ-gă-ndó, te ni vǎ cúndùu líhli-gă iní-ndó, te ni vǎ cúú ùhú-gă iní-ndó tnàha ñáyiu-ndo, te ni vǎ cǔcuèhé-gă-ndǎ-yu, te ni ìⁿ-gă tnúhu cuèhé vá càháⁿ-ndó. ⁹Te ni vǎ dácuàndehnde-gă-ndó, chi nchòhó sa ní dáñá-ndó nchàa ichi cuehé ichi duha, te ñá túú-gă sání cuèhé sání dùha iní-ndó nǎ cada-ndo vitna datná ní xóo cada-ndo. ¹⁰Te vitna nchòhó ní nduu-ndo ñáyiu váha, te uuⁿ-gă tá cùtnuní iní-ndó nchàa nacuáa cuíní Yǎ Ndiöxí cada-ndo, te ducaⁿ ta ndùcu ndee-ndo quide-ndo mee-ni sá vǎha dàtná quidé mèe-gă. ¹¹Te vitna ní ngúndecu ndìhi-ndo Xítóhó Jesucristú, te vá cádá cuendá-gă-ndó nǔu cùu-ndo ñáyiu isràél àdi ñá túú cùu-ndo, te ni vǎ cádá cuendá-ndó nǔu cùu-ndo ñáyiu ní ngúndecu sǎhá ñii-xi àdi ñáhá, te ni vǎ cádá cuendá-ndó nǔu cùu-ndo ñáyiu véxi ñuú xícá, te ni vǎ cádá cuendá-ndó nǔu cùu-ndo ñáyiu cùu neñuú, te ni vǎ cádá cuendá-ndó nǔu cùu-ndo ñáyiu ñá túú tnàhí dàñá quee núú chíúⁿ pàtróóⁿ-xi, te ni vǎ cádá cuendá-ndó nǔu cùu-ndo ñáyiu dàñá queé nǔú chíúⁿ pàtróóⁿ-xi, chi Xítóhó Jesucristú cúnùu-gă ndécú ndìhi ñaha-gă xii-o nchàa-o.

¹²Te Yá Ndiöxí ní dáquée òhíⁿ ñaha-gă xii-ndo cuendá cundecu-ndo ndìhi-gă, te vitna cùu-ndo ñáyiu quide ndáá ndécú ìchi-gă. Te mee-gă ío

cùu iní ñáhá-gă xii-ndo nõu xǎⁿ tàú-ndó cùndahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyiũ ndàhú iní-xi, te ío vii ío váha cuu iní-ndó cùndecu ndihĩ tnaha-ndo, te ío cànũu cunduũ iní-ndó cuèndá nchaa sá quídé ñàha ñáyiũ xii-ndo. **13**Te ducaⁿ cànẽhe-ndo tnúhu cànũu iní núú ndi m̀e-ndo nacuáa ndècu-ndo ichi-gá, te cada cànũu tucu iní-ndó nõu ná cúú sǎ cúmǎní nõú tnáhá-ndó. Te dàtná ní quide cànũu iní Xítohó Jesucristú nchaa sá ñà túú vǎha ní xóo cada-ndo ducaⁿ càda-ndo cada cahnu iní-ndó nchàa sá cúmǎní nõú tnáhá-ndó ndècu-ndo. **14**Te xini ñũhu vihi-xi sá ïo cuu iní tnáhá-ndó cùndecu-ndo, chi núu ducaⁿ na càda-ndo, te quide-ndo nchaa dava-gá sá cǎháⁿ-í, te ñá túú tnàhí-gá ná cúmǎní-ndó. **15**Te daña-ndo sǎ Yǎ Ndiõxí ná chindee ñaha-gá nàcuáa ío váha cuu iní-ndó cùndecu-ndo, chi diu cuèndá-áⁿ ñĩ cǎháⁿ ñáhá Yǎ Ndiõxí xii-ndo cuèndá cuu ïⁿnuu-ndo ndihĩ nchaa dava-gá ñáyiũ ndècu ichi-gá, te ducaⁿ-ni ïo ndacáⁿ táhú-ndó nõú-gǎ.

16Te ío cuhuⁿ iní-ndó tnúhu Xítohó Jesucristú, te ío váha cuáha-ndo cuèndá nàcuáa cǎháⁿ tnúhu-gá te ducaⁿ dǎnehé tnáhá-ndó. Te ío cǎháⁿ dóho tnàha-ndo nacuáa cada-ndo cànchicúⁿ nihnu-ndo càda-ndo nchaa nacuáa cǎháⁿ tnúhu-gá, te cata-ndo ndùdú ndèé núú tùtú Yǎ Ndiõxí, ndihĩ nchaa dava-gá ndudú sá xini m̀e-ndó xita-ndo te nchaa xǎⁿ cata-ndo chĩnuhu-ndo Yǎ Ndiõxí. Te òré xítá-ndó te ñi yũhu ñi iní-ndó ndacáⁿ táhú-ndó nõú-gǎ. **17**Te cuhuⁿ iní-ndó Xítohó Jesucristú òré sání iní-ndó càda-ndo ïⁿ chiuⁿ àdi ná tnúhu cuìní-ndó cǎháⁿ-ndó, te diu-ñi-gá cuhuⁿ iní-ndó. Te xini ñũhu-xi ndacáⁿ táhú-ndó nõú Yǎ Ndiõxí, te diu-ñi Xítohó Jesucristú chindee ñàha-gá xii-ndo ndacáⁿ táhú-ndó nõú Tǎtá-ó Dũtú Ndiõxí.

Nàcuáa tàú ñáyiũ ndècu ichi Xítohó Jesucristú cadá-yu sá cúú-xi ndi meé-yu

18Te nchaa nchòhó ñáyiũ d̃hí ñáyiũ ndècu yii-xi quindáa iní-ndó yii-ndo, chi ducaⁿ tàú-xi cada nchaa ñáyiũ d̃hí ndécú ìchi Xítohó Jesucristú. **19**Te nchaa nchòhó cue tée ndècu ñadihí-xi cuu iní-ndó ñadihí-ndó, te vá cǔcuèhé-ndõ-yu. **20**Te nchaa nchòhó ñáyiũ ndècu tátá-xi ndihĩ nǎná-xi quindáa iní-ndõ-yu, chi núu ducaⁿ na càda-ndo te ndũu vétú iní Yǎ Ndiõxí. **21**Te nchaa nchòhó ñáyiũ cùu tátá ndihĩ nǎná vá dásatú-ndó iní cue déhe-ndo, chi núu ducaⁿ na càda-ndo te ñi vǎ quixí-gǎ iní-güexi cada-güexi sá vǎha. **22**Te nchaa nchòhó ñáyiũ xinu cuechi quindáa iní-ndó nchàa ñáyiũ cùu patróⁿ-ndó, te ñi yũhu ñi iní-ndó càda-ndo nchaa chiuⁿ tahú-yu cuèi òré ndécũ-yu àdi òré ñá túũ-yu, te ñá díú òré-ñi ndèhé-yu cada-ndo cuèndá-ñi sá cuìní-ndó cùdiu-ndo nõũ-yu, chi cada-ndo sǎ nèhé-ndó sǎ yĩñũhu núú Xítohó Jesucristú. **23**Te nchaa chiuⁿ sani iní-ndó

càda-ndo te cada-ndo ñi yuhu ñi iní-ndó, te sá dúcáⁿ càda-ndo-áⁿ te cada-ndo cuèndá sá xínú cuèchi-ndo núú Xítohó Jesucristú te ñá díú nǔú ñáyiú ñuyíú-a xínu cuechi-ndo. ²⁴Te nchòhó sa nàha-ndo sá Xítohó Jesucristú taxi-gá sá ndúú tǎhú-ndó te núu ducaⁿ na càda-ndo, chi cùu-ndo ñáyiú xínu cuechi núú-gǎ. ²⁵Te nchaa ñáyiú quide nchaa sá cuèhé sá dúhá nàcháhu-yu núú Yǎ Ndiöxí cuèndá nchaa sá quídě-yu, te mee-gǎ vá cáda cuèndá-gá cuèi náí ñáyiú cùú-yu, chi nchaá-yu nacháhu-yu nchaa sá ñà túú vǎha quidé-yu núú-gǎ.

4 ¹Te nchaa nchòhó ñáyiú cùu patróoⁿ cuu-ndo ñáyiú váha, te cada-ndo nchàa nacuáa tàú-xi cunduu ndihi nchaa ñáyiú xínu cuechi núú-ndó, te cunaha-ndo sǎ àndiu ndecu Yaá cúú Xítohó-ndó tàxi tnuní ñáhá-gǎ xii-ndo.

²Te nchaa nchòhó ñáyiú ndècu ichi Xítohó Jesucristú, vá dáñá ndèé-ndó cǎháⁿ ndihi-ndo Yǎ Ndiöxí, te ío cuhuⁿ iní-ndó-gǎ òré cǎháⁿ ndihi-ndo-gǎ, te òré-áⁿ ío ndacáⁿ tǎhú-ndó nǔú-gǎ. ³Te cácaⁿ tǎhú-ndó tnàhá cuèndá-ndí núú-gǎ cuèndá sá díú-gǎ ná cáda te ndacu-ndí cáháⁿ-ndí tnúhu-gá núú nchàa dava-gá ñáyiú, te ducaⁿ cǎháⁿ-ndí tnúhu Xítohó Jesucristú sá ñǎ túú ní xíndecu ndihi nchaa ñáyiú ní xíndecu ndéé sanaha, te diu cuèndá tnúhu-áⁿ yǎhì-í vecaá vitna. ⁴Te cáháⁿ ndihi-ndo Yǎ Ndiöxí cuèndá cáháⁿ-í nàcuáa tàú-xi cunduu te tecú tnùní-yu.

⁵Te cada-ndo nchàa nacuáa tàú-xi cunduu sá cúú-xí nchàa ñáyiú ñá túú ndècu ichi-gá, te ducaⁿ-ni ío nducu ndèe-ndo cada-ndo nchaa nacuáa tàú-xi cunduu. ⁶Te cada cuèndá-ndó sǎ ío vii ío váha cunduu tnúhu cáháⁿ ndihi-ndó-yu, te cáháⁿ-ndó ìⁿ tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ìⁿ íⁿ-yu.

Tnúhu ndéé núú ñí ndihi-ná

⁷Te té Tìquicú téé ío cùu iní-ó ndècu ndihi-o ichi Xítohó Jesucristú, téé-áⁿ cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítohó Jesucristú te ío váha quide ndáá-dé. ⁸Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndihi-ndo. ⁹Te tnàhá tucu té Ònésimú téé ío cùu iní-ó ndècu ndihi-o ichi Xítohó Jesucristú quixi ndihi-dé, te diu-ni téé ñuú-ndó cùu-dé te tnàhá-dé ío váha quide ndáá-dé. Te ndi ndùú-güedé cachí tnúhu-güedé nchaa nàcuáa cùu iha.

¹⁰Te té Arìstarcú téé yǎhi ndihi-í vecaá quidé ndèe iní ñáhá-dě xii-ndo ndihi té Mǎcú ñaní pǎmú tǎ Bèé. Te sa nàha-ndo nchaa nacuáa ní cáháⁿ-í cada-ndo quèheⁿ cuèndá-ndó tǎ Mǎcú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuèndá-ndó-dě. ¹¹Te tnàhá téé nàni Jesús, àdi Bustú chi úú diu-dé, quidé ndèe iní ñáhá-dě xii-ndo. Te cue téé-a cùu-güedé cue téé isràél ní chitnahá ñáhá-güedě xii-í cǎháⁿ-ndí

núú ñáiyu nàcuáa ndíhu ndaha ñàha Yá Ndiöxí xií-yu, te ni ñíⁿ-gá ñáiyu israél ñá túú quide datná quidé-güedě. Te ío váha tàxi-güedé tnúhu ndee iní xii-í. **12**Te tnàhá té ñuú-ndó tē Ěpafrás quidé ndèe iní ñáhá-dě xii-ndo, te cùu-dé tnàhá-dé té xìnu cuechi núú Xítohó Jesucrìstú. Te ducaⁿ-ni nì yuhu ni iní-dé xicáⁿ táhú-dě núú Yá Ndiöxí cuèndá-ndó cuèndá sá cànchícúⁿ nihnu-ni-ndo ìchi-gá, te ducaⁿ te ío váha tecú tnùnì-ndó nchàa nacuáa cuìnì Yá Ndiöxí cada-ndo, te ñiu-ni ducaⁿ cànchicúⁿ nihnu-ndo càda-ndo. **13**Te yúhú càchí tnúhu ndáá-í xii-ndo sǎ sùúnì sàni iní-dé sá méé-ní sǎ vǎha cuu xii-ndo cùndecu-ndo ndihi nchaa ñáiyu xǐndecu ichi Xítohó Jesucrìstú ndécú ñùú Laodìceá, ndihi nchaa ñáiyu xǐndecu tucu ichi-gá ndécú ñùú Hièrǎpolís. **14**Te tnàhá té Lùcá té xìnì nchaa núú yǔcú sǎ quidé tǎtna quide ndee iní ñáhá-dě xii-ndo tée ío cùu iní-ó, te tnàhá tucu té Dēmás quidé ndèe iní ñáhá-dě xii-ndo.

15Te cúñaha-ndo na càda ndee iní nchaa ñáiyu ndècu ndihi-o ichi Xítohó Jesucrìstú ndécú ñùú Laodìceá, ndihi tá Mǐnfás, ndihi nchaa ñáiyu ndècu ichi-gá tàcá vehe-xi dàcuahá-yu tnúhu-gá. **16**Te tutú cǎdǔha-í-a tendaha-ǐ quixi ndaha-ndo, te òré ná ndíhí dàcuaha-ndo te tendaha-ndo quǐhíⁿ ndaha ñáiyu xǐndecu ichi-gá ndécú ñùú Laodìceá cuèndá dacuàhá-yu tnàhá-yu. Te ñiu-ni ducaⁿ dàcuaha-ndo tutú tendaha-ǐ quǐhíⁿ ndaha ñáiyu ñuú Laodìceá òré ná dǎndixí-yu ndaha-ndo. **17**Te na cǎchí tnúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndiöxí ní taxi-gá chiuⁿ quide-n, te ío váha cada cuèndá-n càda-n nchaa nacuáa ní cachí-gá”, duha cúñaha-ndo xii-dé.

18Te yúhú té Pǎblú ndihi ndaha mee-ǐ tē-í ñíⁿ ũú tnúhu-a quide ndee iní ñáhà-í xii-ndo, te cunaha-ndo sǎ yǔhú yǐhì-í vecaá. Te Yá Ndiöxí ío na chǐndee chitúu ñaha-gǎ xii-ndo. Te ducaⁿ na cùnduu. Te ío chí cǎdá ndèe iní-nǎ vitna.